

Alþingi, nefndarsvið  
sjávarútvegs- og landbúnaðarnefnd  
Austurstræti 8-10  
150 Reykjavík

Garðabær

9. september 2009

**Umsögn um frumvarp til laga um breytingar á ýmsum lögum vegna endurskoðunar á undanþágum frá I. kafla I. viðauka við EES-samninginn og innleiðingar á reglugerð Evrópuþingsins og ráðsins (EB) nr. 178/2002 frá 28. janúar 2002 auk afleiddra gerða. Þskj. 241 – 147. mál.**

Á fundi heilbrigðisnefndar Hafnarfjarðar- og Kópavogssvæðis þann 31. ágúst 2009 var ofangreint mál til umfjöllunar.

Heilbrigðisnefnd þakkar fyrir að hafa fengið tækifæri til að koma að sínum sjónarmiðum og telur þörf á gera athugasemdir varðandi eftirtalin atriði vegna breytinga á lögum um matvæli, nr. 93/1995, með síðari breytingum:

1. þegar flytja á verkefni frá sveitarfélögum til ríkisstofnunar er nauðsynlegt að hafa um það samráð við sveitarfélögin,
  2. að gæta verði að hagsmunum neytenda með gangsæi í matvælaeftirliti að leiðarljósi,
  3. að lagatexti verði skýr um framkvæmd markaðseftirlits með matvælum þannig að matvælaöryggi fyrir neytendur verði ekki fyrir borð borið.
  4. að menntunarkröfur verði gerðar til starfsfólks í matvælavinnslu.
- Samkvæmt frumvarpinu fer fram flutningur verkefna frá stofnunum sveitarfélaga til ríkisstofnunar og það án samráðs við sveitarfélögin svo vitað sé. Heilbrigðisnefnd telur það vera í mótsögn við almennt boðaða stefnu stjórnvalda um að einfalda eftirlit hjá fyrirtækjum. Ekki hefur verið sýnt fram á hagræði af breyttu fyrirkomulagi sem lagt er til í gr. 4 í frumvarpinu. Þá hefur heilbrigðisnefnd efasemdir um að það sé forsenda fyrir innleiðingu evrópskra lagasetningar að framkvæmdin sé á hendi ríkisstofnunar. Mælt er með því að fella niður lið c og d í 4b. gr.

Almennar leyfisveitingar og stjórnsýsla er til muna opnari á sveitarstjórnastigi og heilbrigðisnefndir lúta í dag eftirliti Matvælastofnunar. Verið er að fjarlægja eftirlit úr nærumhverfi neytenda með því að færa daglegt eftirlit til Matvælastofnunar í jafn ríku mæli og lagt er til. Möguleiki á gagnrýnni yfirumsjón hverfur um leið.

Með lögleiðingu frumvarpsins í núverandi mynd mun gegnsæi málaflokksins minnka til muna, bæði neytendum og stjórnvöldum í óhag. Með boðuðum



breytingum hverfur eftirlit inn í eina ríkisstofnun sem sinna á bæði eftirliti og allri stjórnarsýslu. Ákvæði 14. gr. frumvarpsins um að Matvælastofnun hafi yfirumsjón með matvælaeftirliti verður þannig marklaus ef stofnuninni verður jafnframt falið að sjá um meira og minna um eftirlit á markaði og vettvangi.

- Lagatexti verður að vera skýr þegar kemur að flutningi vara innan evrópska svæðisins, þ.e. hvað varðar framkvæmd markaðseftirlits sbr. 19. gr. og 23. gr. frumvarpsins. Af frumvarpinu verður helst ráðið að aðeins sé nauðsynlegt að viðhafa skyndiskoðanir og sýnatöku til rannsókna á búfjár- og sjávarafurðum en ekki öllum matvörum. Markaðseftirlit þarf að auka hér á landi varðandi alla matvöru.

Mælt er með að ákvæðum í 19. gr. frumvarpsins verði gerð viðtækari í ljósi hagsmuna neytenda um öryggi matvæla.

- Það er mat heilbrigðisnefndar að tímabært sé að setja menntunarkröfur fyrir starfsfólk í matvælavinnslu. Í 7. gr. frumvarpsins er ráðherra veitt heimild til að setja reglur um að þeir sem starfa við framleiðslu og dreifingu matvæla skuli sækja námskeið um meðferð matvæla þar sem sérstök áhersla er lögð á innra eftirlit og öryggi matvæla.

Með hagsmuni neytenda að leiðarljósi er ástæða er til að kveða skýrar að orði um skyldu ráðherra til að setja slíkar reglur og stjórnendur matvælafyrirtækja að virða þær.

Virðingarfyllst,  
f. h. heilbrigðisnefndar.

  
Guðmundur H. Einarsson,  
framkvæmdastjóri.